

Մինչև 6—7 տարեկան հասակը տղա թե աղջիկ ազատ վազվզում, խաղում էին, անցկացնելով օրվա մեծ մասը դուրսը և տուն ներս վազելով, հոյց ու պանիր կամ մի այլ ուտելու բան վերցնելու և իսկույն տանից դուրս փախչելու համար: Աղջիկներն ավելի վաղ էին սկսում մասնակցել տնային աշխատանքներին՝ իրենց կրտսեր եղբորը կամ քրոջն էին օրորում, թեթև ամանով աղբյուրից ջուր բերում, տունն ավլում: Մինչև 12 տարեկան հասակը նա արդեն սովորած էր լինում մոր, տան մեծ հարսի կամ ավագ քրոջ ղեկավարութեամբ գուլպա, գորգ ու կարպետ գործել, տնային աշխատանքների որոշ կարգ ու կանոնին հետևել, մեծերին և հյուրերին սպասավորել, այն ամենը, ինչ որ նրան պետք պիտի գար ապագայում ուրիշի տուն որպես հարս անցնելու ժամանակ, ինչպես և սովորած էր լինում փոքր երեխաներին խնամել, քանի որ մինչ այդ արդեն մայրական տանը նրան էլ հանձնվում տան փոքրիկներին օրորելը, խտտած ման ածելը, երեսները լվանալը, կերակրելը, քնացնելը և այլն: Տղաներն էլ այդ միջոցին արդեն ընտելացած էին լինում գառնարածութեան, տավարածութեան, մեծերին օգնելու վարի, հնձի, կալսելու ժամանակ: 12—13 տարեկան տղան արդեն դառնում էր ընտանիքի կրտսեր աշխատավոր անդամը:

Բայց մինչև երեխաների այս հասակին հասնելը, մանավանդ նրանց ղեռ ծծկերութեան ժամանակ և առաջին տարիները, հայրն ու մայրը կարծես ամօր էին համարում ցույց տալ, թե իրենք նրանց ծնողներն են: Մայրը իր պատրօնի՞ն՝ սկեսրայրին, նույնիսկ իր հորը տեսնելուն պես երեխային գրկիցը վայր էր դնում, կարծես իրանը չէր: Պատահել էր, որ կամուրջի վրա¹⁰⁶ հորը կամ պատրօնին պատահելով, մայրը երեխային ձեռքից իջեցրել է, գեանին դրել և մի կողմ կանգնել: Երեխայի հայրն էլ իր հոր տուն մտնելը տեսնելուն պես դադարում էր իր երեխային ծնկան վրա նստեցրած խաղացնել և անմիջապես իջեցնում էր նրան կարծես թե իրանը չէր: Այսինքն, թե՛ կինը և թե՛ տղամարդը ամօր էին համարում և խուլս էին տալիս ցույց տալու, թե իրենք ունեցել են սեռական մերձեցում, որի հետևանքն ու կոնկրետ ապացույցն է ծնված երեխան: Այդ ամօրը բխում էր անկասկած նույն նախնական հասկացողությունից, որով մեղք էր համարվում սեռական մերձեցումը և նորապսակներն առագաստից հետո որպես մեղք գործածներ քառասուն օր նկատվում էին պղծված հանցագործներ: Այդ նույն մտայնութեամբ պիտի բացատրել, որ որսորդ որսի գնալուց առաջ, քահանան պատարագ կատարելուց առաջ նախորդ գիշերը պիտի հրաժարված լինեին սեռական մերձեցումից:

Նույն մտայնութեան հետքերն են պահպանվել այն բանի մեջ, որ տղամարդը իր կնոջը, կինը իր ամուսնուն ուրիշի ներկայութեամբ խոսելիս չէր կոչում «իմ կինը» կամ «իմ մարթը»: Տղամարդը իր կնոջ մասին ասում էր՝ «մէր հարսը», «Թումիի աղջիկը», «Գիբիի քուրը», իսկ աներոջը դիմելիս՝ «ախչիկըտ», կնոջն էլ դիմելիս՝ մանավանդ ուրիշների ներկայութեամբ՝ «Ա՛յ, Թումիի ախչիկ», «ա՛յ, կնիկ»:

Կինն էլ ամուսնու մասին խոսելիս չէր ասում «մարթը» կամ նրան դիմելիս անունը տալիս, այլ սկեսրոջը դիմելիս ասում էր՝ «տղէտ», տալոջը՝ «ախպէրըտ», տեգեր կնոջը՝ «տէգրըտ», իր ծնողներին՝ «փէսէտ», ուրիշներին՝

¹⁰⁶ Գորիս գյուղի և Գորիս քաղաքի միջև: